



Հուսիկ Արա

Pandemia

Մեկ մետր է արգելքը մեր միջև,
հագիվ այնքան, որ ձեռքերը չհասնեն իրար.
աղմկոտ մեղքն էր մեր արանքում,
հիմա լուռ տեղավորվել է Աստված.
որքա՞ն նեղ տարածք է հարկավոր լույսին՝
ազատ զգալու համար:

Փակ են դռները,
պատուհանները՝ գոց.
աշխարհն է ազատ:
Կապած քիթուքերան.
բառը չի հնչում՝ ձայն անապատի,
և կարեկցանք է ամեն խոսք:

Հարազատ է մեր փախուստը,
մտերիմս,
սիրտ է ու բարի կամք.
չենք արտանետում մեր ներսինը,
և չի թունավորվում երկինքը՝
որտեղ մեր երազներն են:

Դատավոր է խիղճը,
և գթությունն այնքան շատ է,

որ բանտն էլ է բուժարան.

Մարիամ է ամեն ճերմակ խալաթ

և Քրիստոս մեր մեջ՝ յուրաքանչյուր դեղահաբ:

Բնությունը սնում էր,

որ հոշոտենք իրեն.

հիմա մաքուր լվացված է աշխարհը՝

առանց անձրևի:

Ինչ սպիտակ է լույսը ծաղկած սալորենու մեջ

և որքան կապույտ,

երբ կաթում է մանուշակի թերթերին:

Տիեզերքի գարունը

երկիր է հասել աներկյուղ՝

մարդուց անսարսուռ.

բացակա են մեր ձեռքերը: